

## **AVERTURA PUNT RAIN ANTERIUR DANIS-TAVANASA E SURDADA DA LA PUNT DA VERSELL 30 DA SETTEMBER 2016**

---

*PLED DA RITA CATHOMAS-BEARTH, PRESIDENTA DA L'UNIUN NOSSA PUNT*

Stimai tuts presents,

Jeu hai la honor d'astgar esser cheu oz cun vus e festivar l'avertura da quella nova ed imposanta punt. Jeu gratuleschel e selegrel cun la vischnaunca da Breil da quei bi edifezi. Mo oz astgein nus era selegrar che la punt veglia resta. Dad oz naven han ils pedunzs libra via.

Cu zatgei niev vegn, sedamond'ins magari: Tgei far cul vegl? Eisi giustificau da salvar ina punt veglia? Tgei renda quei? Tgi paga quei? - Buca tut quei ch'ei vegl e scardaliu vala la peina da vegnir manteniu. Quei che ha denton ina valur e qualitat, gliez bein, gliez semantegn e pren tier en valeta.

Sur la punt da Versell vi ein entiras generaziun idas ni carradas: poppas e pops en crotscha, affons da scola, spusas e schuldada, victurs e sperdidiers, leghers e trests, glieud en la flur dalla veta e morts en bara. Pli che la mesadad dalla vischnaunca da Breil ei vegniu transportau cun camiuns che vegnevan pli e pli gronds sur quella punt vi: lenn, beton, glera, fier e maschinas.

Quei ligia e dat regurdientschas. Digna de vegnir mantenida per proximas generaziuns ei la punt veglia denton pervia da sia architectura e construcziun che vegn reconuschida dals experts lunsch entuorn. L'ovra ch'igl inschignier grischun Walter Versell ha baghegiu 1927, suenter la bova, ei in'ovra da vaglia. E talas ovras, monuments culturals da nies temps, ston ins mantener. Els ein part da nossa identidad. Da quellas ovras ha la Surselva buca memia biaras! Cons stattan per exempel mal oz che la veglia punt-lenn da Glion ei svanida per adina.

Grazia all'uniun NOSSA PUNT ha punt vegliada da Tavanasa ina megliera sort. Grazia al sustegn da biaras commembras e commembers eis ei reussiu a nus da perschader e da cattar il sustegn dil cantun e dalla vischnaunca. Aschia sa il cantun surdar oz la punt a la Fundaziun NOSSA PUNT cun siu president Sep Cathomas, a. derschader federal Giusep Nay ed auters. Impurtont ei stau che la vischnaunca da Breil ha dau maun e surpriu il diever dalla punt e sia tgira. La fundaziun accumpogna la reparaziun e procura la finanziaziun. Grazia al grond sustegn dil cantun, dalla tgira da monuments e digl uffezi da vias dalla confederaziun ei ina gronda part dils cuosts cuvretgs. Mo ei drova aunc vinavon empau stentas per financiar ils 900'000 francs e per che tut vegni a buna fin. En cerca in onn sperein nus da saver festivar la punt da Versell renovada e preparada per proximas generaziuns sco document dad in temps vargau che tonscha el futur – e che fa er smarvegliar ils hosps d'ordeifer che vegnan tier nus e vulan er enconuscher nossa cultura.

Jeu engraziel a tut tgi che ha merets che quella punt vegn salvada,

- allas commembras ed als commembers dall'uniun NOSSA PUNT
- al schef dil departament da construziun, cuss.guv. Mario Cavigelli, ses collavuratus ed a l'entira regenza grischuna
- alla tgira da monuments cantunala e federala
- alla Protecziun dalla patria grischuna
- allas personas ed instituziuns che gidan a financiar la renovaziun
- alla vischnaunca da Breil cun siu president actual Clau Schlosser
- alla Fundaziun NOSSA PUNT, a siu president e ses commembers,
- a mes consuprastonts dall'uniun NOSSA PUNT
- ed a l'entira populaziun da Breil – Danis – Tavanasa che ha – ni che survegn speranza era in di a haver ton plascher dalla punt veglia sco sco quei ch'ella ha oz dalla punt nova.